

Emmo partecipòu in fòrse, co-o gonfalon, a-e nòstre çeimònne religiose e civili: d'arvì a fèsta de Santa Zitta e a messa pe San Zòrzo a-e Vigne; a zugno e porcescioin do Corpus Domini, de San Gianbatista e de Sant'Antonio a Bocadaze; de luggio a nòstra fèsta-spetacolo che tutti i anni òfrimmo a-a çitæ, *A Paxo in zeneize*; d'òtobre o Palio mainâ a Sturla e a depoxiçion de coronn-e davanti a-a caza de Colombo; de novembre a fèsta da Madonna de Vigne; a dizenbre a deposiçion da coronn-a a-o monumento do Balilla, a messa pe-o sciolimento do voto in Oeginn-a e pòi o trionfo do Confeugo a De Ferrari, co-ina bèlla sciamma èrta into scuo da seia e in muggio de gente a vedde e pòi, de d'ato into salon, a cantâ *Ma se ghe penso*: comovente.

Ai 16 de novembre in Sarzan l'è stæto consegnòu i Premi da Compagna, co-a partecipaçion di rapresentanti da Region, do Comune e da Camia de Comèrcio: 'na bèlla çeimònna, che però a no l'è ciù tanto sentia comme 'na vòtta: l'è cangiòu i tenpi!

A-i 22 de setembre a Tursci gh'ea stæta a premiaçion do *Lauro d'Oro*, o ciù antigo concorso de poexia zeneize varòu do 1959 pe sostegnì e fâ conosce e parlæ da Liguria, òrganizòu da-o Circolo Mario Cappello insemme con A Compagna.

Ai 19 d'òtobre, in sede, gh'ea stæta 'n atra premiaçion, in tentativo ch'emmo vosciuo fâ pe atirà i zoeni laoreæ. Dâvimo 500 eori a-e trà megio tezi in sce Zena e a Liguria, ma scicomme ne n'ân prezentòu solo quattro, e ean bonne, emmo decizo de premiale tutte e de no ripete l'esperienza. Pe contra, 'n esperimento ch'o l'â avuo in sucèssò insperòu l'emmo fæto a-i 16 d'arvì, *A Compagna in Campetto*: emmo misso in banco in ciassa pe vende libri nòstri e còse fæte da-i sòcci, emmo tiòu sciù 700 eori e l'emmo destinæ tutti a-o restaoro de 'n stemaio preçiozo conservòu inte l'Archivio de Stato.

Scicomme gh'emmo asæ de palanche, emmo anche finançiòu con 400 eori o restaoro da Madonna do prezepio da Duchessa, conservòu a Ôtri into santoaio de Graçie. E moneghe de lasciù, che quest'anno chi no gh'âivan e seu statoinn-e, tutte anæte a fase bèlle, n'ân domandòu pe Natale o prezepio da Compagna, e ben voentea ghe l'emmo inprestòu.

I Martedì, nòstro apontamento fisso, da quande se fan in Sarzan en senpre ciù segoi, perché e conferense en itersanti e no gh'è o problema d'arivâ fito pe asetâse: gh'è pòtronn-e pe tutti, o pòsto o l'è bèllo e, 'na vòtta pigiòu o gfo, l'è façile arivaghe.

I Venerdì ascì en anæti ben: semmo ormai a-o sèsto anno, da un a-o meize en diventæ doì e, comme pe i Martedì, no femmo goæi fadiga a trovâ i relatoi perché vegnan voentea, Chi però gh'è 'na nòtta de tristessa, perché a novembre n'â lasciòu tròppo fito o Agostin Bruzon, o tenico do gruppo, veo zeneize de pòche paròlle, anche s'o l'ea de Roscigion.

A mazzo l'è stæto fæto a gita sociale, quest'anno a Vàiçe Ligure (perché se va 'n anno into Ponente, 'n anno a Levante e 'n anno inte l'entrotæra de Zena) e comme senpre a l'è stæta in sucèssò.

L'è stæto fæto anche de vixite goidæ particolari e ben ben itersanti in çitæ e dintorni: a marso a-a sede da Fondaçion Ansaldo, d'arvì a l'Istituto do Restaoro do Mòbile, a

zugno a-i "inpianti speciali" de l'AMT (i ascensori de Montegaletto e Casteletto e a cremaliera de Granaieu), a luggio a-a diga da Buzaletta e a-i inpianti do Nicolay, de novembre a l'Archivio de Stato.

O nòstro prescidente o l'â tegnuo comme ògni anno o corso de zeneize, e ò l'â dæto vixibilitæ a-a Compagna partecipando pontoalmente tutti i venerdì seia a-a trasmiscion *Liguria ancheu* de Primocanale, segoia con pascion da Vintimiggia a Sarzann-a.

Anche quest'anno emmo goâgnòu o bando regionale pe mandâ i nònni inte scheue a mostrâ o zeneize a-i figeu: ân aderio 'na quarantenn-a de scheue (140 classi) e in çentanâ de nònni, 'na beliscima còsa, ch'â fa contenti grandi e picin.

Sucede senpre ciù de spesso che a Compagna a segge invitâ a partecipâ a manifestaçion: ai 14 de mazzo emmo misso in banchetto a-o mercatin di *Repassin* da Madænn-a, che i abitanti e i comercianti òrganizzan pe revitalizâ 'na zòna co-in pò de problemi; ai 29 emmo ascistio a-a messa in zeneize davanti a-a capeletta in sciò ponte de Cornigen; o 31 d'agosto n'â invitòu l'Acquario pe festezâ in zeneize co-i figeu i trei neuvi drafìn nasciui lì; ai 16 de setembre a biblioteca Berio â n'â riservòu 'na vixita speciale pe vedde da-a vexin i sò libri ciù preçiozi; o primmo de novembre semmo anæti a Stagen, invitæ da l'asociaçion *Per Staglieno*, pe-a scistemaçion de cocarde rosse-bleu in sce-e tonbe de vege glòrie do Zena.

No v'angoscio con l'elenco de tutte e domande de patrocinio e colaboraçion ch'emmo riçevuo e acetòu: in tanti ghe tègnan a poeise òrnâ do nòstro scinbolo.

O Boletin o l'è sciortio pontoale ògni trei meixi e gh'è stæto chi n'â fæto i complimenti perchè o l'è bèllo e itersante: çerchemmo de trovâ senpre neuvi colaboratoì da affiancâ a-i nòstri fedeliscimi, pe fâ da divulgacion de bon livello, e bezeugna dî che raramente se fan pregâ pe mandane di articoli.

A nòstra biblioteca specializâ *Ezio Baglini* a l'è stæta rioridinâ e catalogâ, semmo a squæxi 5000 titoli e contino-emmo a riçeive donaçion e libri apenn-a sciortii. Fito scistemiemo megio a sala de letua.

O consolato o s'è rionio ciù ò meno 'na vòtta a-o meize, senpre squæxi a-o completo, e ògni vòtta o l'â deliberoù l'amiscion de 'na dexenn-a de neuvi sòcci: i zoeni en pòchi, ma l'è perché pe avei coæ d'intrâ in Compagna bezeugna ese maturi (ma no ancon marsci).

Anche a consulta a s'è rionia, pe asegnâ i premmi, con bonn-a partecipaçion.

Pe ûrtime parlemmo de palanche: o bilancio o va ben, ve ne parliâ a nòstra tesorea, e poemmo spende (senza stragiâ, l'è ciæo) pe-a nòstra sede, pe-i eventi che òfrimmo de badda a-a çitæ e pe contributoi a quarche restàoro do nòstro grandiscimo patrimonio.

Graçie a tutti viatri e femmose i complimenti un con l'âtro pe fâ parte de questa bèlla e gloriosa asociaçion.

*Alegri!*

Isabella Descalzo  
Gran Cancelliera